

Pur sursilvan gudogna encunter ElCom e Repower

Ina nova sentenza dal tribunal federal dat atras la tariffa

DA CLAUDIA CADRUVI / ANR

■ **In pur che posseda implants fotovoltaics less sez tscherner il servetsch che mesira il current. La Repower pretenda ch'il pur n'haja nagin dretg da tscherner libramain il mesirader. Il pur e ses partenari tegnan la dira e battan atras tuttas instanzas. Uss dat il tribunal federal raschun ad els.** Dus implants sa chattan sin las stallas a Luven ed in implant a Schnaus. En questa regiun è la Repower gestiunaria da la rait (Netzbetreiberin). Il 2014 instradescha il pur ils pass necessaris che ses partenari e betg pli la Repower po leger giu sin distanza quant current ch'el spisgenta en la rait. La Repower dat ina risposta negativa.

Adossar custs da passa 20 000 francs Cun sustegn da ses partenari – che posseda in servetsch per talas mesiraziuns – sa volva il pur a la cumissiun d'electricitad (ElCom) e pretenda ina lubientscha per la midada. L'ElCom refusa la dumonda ed adossescha als dus petents ina taxa da 21 240 francs. Els recurren a la proxima istanza: La dretgira administrativa federala reducescha il 2015 la taxa sin la mesadad, ma al giavisch da midar servetsch na dat ella era betg suatientscha. A Losanna survegnan ils dus recurrents la fin finala raschun. Il tribunal federal annullescha la decisiun da las preinstanzas e di che la gestiunaria da rait na possedia en in tal cas nagin monopol da mesiraziun. Ils recurrents n'han ussia da pajar nagina taxa e survegnan dals adversaris in'indemnisaziun da 2000 francs.

Dira critica da Losanna

L'ElCom aveva argumentà che la lescha na dettia als producents da current nagin dretg da tscherna. La dretgira administrativa è stada da l'opiniun ch'i duvrass reglas cleras per ina liberalisaziun da la mesiraziun. Ina tala basa legala n'existia dentant betg.



Implant solar sin il tetg da la stalla da Gion Peder Vincenz a Luven.

FOTO C. VINCENZ

Il tribunal federal crititgescha recentamain la tenuta da las preinstanzas. El fa attent ch'i regia en Svizra la libertad economica. Quest principi è fixà en la constituziun. Betg ina liberalisaziun dovria

ina basa legala, mabain il cuntrari: Là nua ch'ins veglia restrenscher la libertad economica saja indispensablamain necessari ina basa legala. La lescha existentia surdettia a la gestiunaria da rait il dretg exclu-

siv per il manaschi da la rait en sia regiun, ma uschiglio regia la libertad economica, scriva il tribunal federal. Cunzunt n'existia nagin monopol exclusiv da mesiraziun.

La mesiraziun custass mo pli la mesadad

Ses indrizs fotovoltaics ha *Gion Peder Vincenz* bajegià il 2009 ed il 2012 sin ils tetgs da las stallas a Luven ed a Schnaus. Per mintga indriz haja la Repower l'emprim tschentà in quint da circa 800 francs ad onn per las mesiraziuns, di il pur a l'anr.

Suenter hajan ins sbassà il pretsch sin radund 600 francs. Sch'el pudess surdar la mesiraziun a la Swiss Metering da ses partenari custassi be anc la mesadad. Radund 1,3 milliuns francs haja el in-

vestà en la fotovoltaica che producescha current per radund tschient chasadas, di Vincenz. I sa tractia d'ina pulita ristga cunzunt pervi dals «midems» politics.

En Germania hajan ins per exempel sbassà il pretsch ch'ins aveva empermess per energia solara. En Svizra sajan ils pretschs anc garantids, ma ins na sappia gea mai.

Er ina gronda erupziun d'in vulcan pudess smesar tuttenina sias entradas.

Valentin Gerig porscha cun sia Swiss Metering mesiraziuns per producents da current. «La sentenza da Losanna munta in schleppa per la bransch d'electricitad, l'ElCom e la dretgira administrativa federala», di Gerig a l'anr. Cun sia fatschenta less el fitgar pe en il martgà da mesiraziun. In producent da current dovria a partir d'ina tscherta grondezza adina talas mesiraziuns.

Il tribunal federal haja uss confermà ch'i regia in martgà liber, di Gerig. Ils

producents dastgian tscherner il mesirader. En il parlament dettia quai deplorablamain la tendenza da manar enavos la roda. Tscherts politichers, entretschads cun la bransch d'electricitad, veglian tegnair or da l'ogn ils mesiraders privats e midar la lescha. Damai che las duas chombras federalas n'èn betg perina quinta Gerig che la revisiun fetschia naufragi. En lez cas fa la sentenza dal tribunal federal effect e novs servetschs da mesirar pon sa profilar.

Tecnicamain nagin problem

Da separar ils dus champs – manaschi da rait e mesiraziun – saja tecnicamain pussaivel senza pli grond problems. Dals radund 700 gestiunaris da rait en Svizra fetschian be circa 100 sezs il management da datas d'energia. Ils auters 600 surdettian ina part da la mesiraziun a terzas persunas. En tut existian radund diesch servetschs che porschian mesiraziuns. Ils derschaders a Losanna na sa refereschan betg mo sin la lescha, mabain prendan era sut la marella minuziusamain l'ordinaziun. En lezza stat ch'ils gestiunaris da rait sajan «responsabels» per las mesiraziuns. Quai «na munta dentant betg stringentamain ch'els ston ademplir sezs ed exclusiv questa lavur», scrivon ils derschaders da Losanna. La gestiunaria haja da procurar ch'il manaschi funcziunia e na vegnia betg periclità. Perquai na stoppia la gestiunaria betg acceptar mintga mesirader, mabain mo quel che adempleschia las premissas qualitativas.

Per examinar sch'il partenari dal pur ademplescha tuttas cundiziuns ha il tribunal federal renvià il cas a l'ElCom. Lezza sto decider tenor las directives ch'il tribunal federal ha formulà sch'il partenari porscha in servetsch suffizient.

Sentenza 2C_1142/2016 dals 14 da fanadur, publicada ils 28 d'avust 2017